

Bil. 56

Khamis

21 November 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Peruntukan untuk Pembangunan Sekolah di Rasah**
- *YB. Tuan Cha Kee Chin (Rasah)* [Halaman 1]
- **Ketelusan LHDN dalam Mengutip Cukai di Bawah
Program Khas Pengakuan Sukarela (PKPS)**
- *YB. Datuk Seri Ir. Dr. Wee Ka Siong (Ayer Hitam)* [Halaman 5]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA**

Khamis, 21 November 2019

Mesyuarat dimulakan pada pukul 2.30 petang

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Peruntukan untuk Pembangunan Sekolah di Rasah

2.34 ptg.

Tuan Cha Kee Chin [Rasah: Terima kasih Tuan Yang di-Pertua. Pada kesempatan petang ini izinkan saya membangkitkan isu yang berkaitan dengan peruntukan untuk pembangunan sekolah-sekolah di bawah Parlimen Rasah. Terdapat 57 buah sekolah harian di bawah Parlimen Rasah yang termasuk 14 buah sekolah menengah kebangsaan (SMK), sebuah sekolah menengah jenis kebangsaan (SJK), 23 buah sekolah kebangsaan, (SK), 12 buah sekolah jenis kebangsaan Cina (SJKC), tujuh buah sekolah jenis kebangsaan Tamil (SJKT).

Sebahagian daripada sekolah ini terletak di kawasan bandar dan sebahagiannya terletak di luar bandar. Tanpa mengambil kira lokasi sesebuah sekolah tersebut, setiap sekolah memerlukan peruntukan pembangunan daripada kerajaan, sama ada untuk kerja membaik pulih kemudahan sedia ada yang sudah rosak, penyelenggaraan berkala dan penambahan atau penambahbaikan kepada kemudahan yang sedia ada.

Adalah menjadi tanggungjawab kerajaan untuk membekalkan kemudahan yang terbaik berlandaskan kemampuan kewangan semasa kerajaan supaya bidang pendidikan akan menjadi penentu masa depan negara.

Saya ingin memohon maklumat dan maklum balas berikut daripada Kementerian Pendidikan (KPM) untuk perkara-perkara di bawah;

- (i) mohon menyenaraikan jumlah peruntukan pembangunan yang diperolehi oleh setiap satu sekolah di bawah Parlimen Rasah pada tahun 2018 dan tahun 2019;
- (ii) apakah ada perancangan untuk membina sekolah baru di Parlimen Rasah memandangkan Parlimen Rasah adalah kawasan yang pesat membangun dengan pertambahan penduduk yang ramai;
- (iii) SK Taman Rasah Jaya memerlukan sebuah dewan serba guna untuk keperluan sekolah ini. Apakah KPM akan membinanya pada tahun 2020 atau selepas itu;
- (iv) SK Labu memerlukan pembinaan bumbung di dataran perhimpunannya. Apakah permohonan ini akan diluluskan oleh KPM;
- (v) SMK Seremban Jaya memerlukan pembinaan bumbung di dataran perhimpunannya. Apakah permohonan ini akan diluluskan oleh KPM;
- (vi) SMJK Chan Wa II sedang rancak dalam pembinaan dewan serba gunanya. Bolehkah KPM memberikan peruntukan khas untuk pembinaan ini;
- (vii) SK Jijan memerlukan sebuah padang sekolah di tapak yang sedia ada. Apakah KPM akan memberikan peruntukan khas untuk pembinaannya;
- (viii) SK Jijan juga memerlukan peruntukan khas untuk pembinaan jalan terus dari Jalan Jijan ke pintu masuk ke sekolah mengikut tanah rizab yang sebenarnya kerana pada ketika ini jalan masuk ke sekolah ini melalui tepi rumah penduduk. Apakah KPM akan memberikan peruntukan khas untuk pembinaan jalan ini;
- (ix) SJKC Kelpin memerlukan peruntukan untuk membina jalan terus dari Jalan Tok Unggu ke pintu masuk sekolah mengikut jalan rizab yang sebenar kerana pada ketika ini jalan masuk ke sekolah melalui kawasan perumahan. Apakah KPM akan memberikan peruntukan untuk pembinaan jalan ini; dan
- (x) SK Tekir merupakan sebuah sekolah yang sebahagian besar muridnya adalah daripada komuniti Orang Asli. Bolehkah KPM memberikan peruntukan khas untuk menaik taraf kemudahan asas dalam sekolah ini.

Saya memohon supaya Yang Berhormat Timbalan Menteri dan KPM dapat memberikan jawapan terhadap setiap satu persoalan yang dibangkitkan di atas. Sekian, terima kasih Tuan Yang di-Pertua.

2.37 ptg.

Timbalan Menteri Pendidikan [Puan Teo Nie Ching]: Terima kasih Tuan Yang di-Pertua. Terima kasih Ahli Yang Berhormat. Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Yang Berhormat Rasah atas keprihatinan Ahli Yang Berhormat terhadap pembangunan pendidikan di kawasan Parlimen Rasah.

Walau bagaimanapun, pihak KPM ingin membetulkan sedikit data jumlah sekolah yang berada di Parlimen Rasah. Untuk maklumat Ahli Yang Berhormat, terdapat 55 buah sekolah harian dan dua buah sekolah berasrama penuh di Parlimen Rasah. Untuk maklumat Ahli Yang Berhormat, bagi memenuhi keperluan sekolah di Parlimen Rasah, kerajaan telah meluluskan peruntukan aliran tunai bagi beberapa projek pembangunan sambungan pada tahun 2018 dan tahun 2019 untuk tujuan penyelesaian bayaran perunding dan akaun muktamad.

Antara projek pembangunan yang diluluskan peruntukan bagi tahun tersebut adalah seperti berikut:

- (i) pembinaan bangunan baru 24 bilik darjah dan lain-lain kemudahan di SMK Bandar Enstek Seremban, Negeri Sembilan. Kos projeknya adalah RM27.59 juta;
- (ii) pembinaan bangunan baharu 24 bilik darjah di SMK Rasah, Kemayan Seremban, Negeri Sembilan. Kos projek tersebut adalah RM19.59 juta;
- (iii) pembinaan satu kelas prasekolah di SK L.B. Johnson, Seremban. Kos projeknya adalah RM300,000; dan
- (iv) pembinaan satu kelas prasekolah di SK Gadong Jaya, Seremban. Kos projek tersebut adalah RM300,000.

Manakala bagi tahun 2019, terdapat satu projek pembangunan yang telah diluluskan iaitu pembinaan gantian empat bilik darjah dan tandas di SK L.B. Johnson di Parlimen Rasah dengan peruntukan RM2.0 juta.

Di samping itu, pada tahun 2018, KPM telah menurunkan peruntukan sebanyak RM319,028 untuk penyelenggaraan 27 buah sekolah di Parlimen Rasah. Bagi tahun 2019, KPM telah menurunkan sebanyak RM399,000 untuk penyelenggaraan 17 buah sekolah di Parlimen Rasah.

KPM melalui JPN atau Jabatan Pendidikan Negeri Sembilan telah merancang pembinaan beberapa buah sekolah baharu untuk menangani masalah kekurangan sekolah akibat pembangunan pesat di kawasan Parlimen Rasah.

■1440

Projek-projek tersebut adalah seperti berikut:

- (i) pembinaan sekolah baharu 24 bilik darjah di SK Seremban 2 Heights; dan

(ii) pembinaan sekolah baharu 24 bilik darjah di SMK Seremban 2 Heights.

Cadangan projek pembinaan sekolah-sekolah tersebut akan dikemukakan oleh JPN Negeri Sembilan kepada KPM dalam Rancangan Malaysia Kedua Belas untuk diangkat kepada agensi pusat untuk kelulusan. Walau bagaimanapun, kelulusan bagi projek-projek tersebut adalah bergantung kepada pertimbangan agensi pusat dan kemampuan kewangan kerajaan.

Berdasarkan garis panduan dan peraturan bagi perancangan bangunan edisi tahun 2015 oleh Jawatankuasa Standard dan Kos Unit Perancang Ekonomi, Jabatan Perdana Menteri, pembinaan dewan tertutup disediakan bagi sekolah yang mempunyai 30 bilik darjah ke atas dengan *enrollment* 900 orang.

Bagi sekolah yang saiznya lebih kecil daripada 30 bilik darjah, KPM menyediakan ruang serba guna terbuka untuk kegunaan warga sekolah. Sehubungan dengan itu, semua pembinaan bumbung di dataran perhimpunan sekolah perlulah memenuhi kriteria yang telah ditetapkan dan dipohon melalui JPN Negeri Sembilan.

Berhubung dengan permohonan pembinaan bumbung di dataran perhimpunan SK Labu dan SMK Seremban Jaya, JPN Negeri Sembilan merancang memasukkan permohonan tersebut untuk dikemukakan dalam Rancangan Malaysia Kedua Belas. Walau bagaimanapun, kelulusan tersebut juga tertakluk kepada keutamaan dan kedudukan kewangan kerajaan.

Tuan Yang di-Pertua, untuk maklumat Ahli Yang Berhormat, SK Taman Rasah Jaya mempunyai bilangan murid seramai 741 orang dan bilik darjah yang optimum bagi sekolah tersebut adalah 24 bilik darjah.

Oleh itu merujuk kepada garis panduan tersebut, pada masa kini pembinaan dewan serba guna adalah tidak sesuai memandangkan bilangan *enrollment* murid dan bilik darjah belum mencapai tahap keperluan yang ditetapkan. Sekiranya pada masa yang akan datang terdapat keperluan dewan tertutup bagi SK Taman Rasah Jaya, KPM sedia untuk mempertimbangkan permohonan tersebut untuk dikemukakan dalam Rancangan Malaysia Ke-12.

Walaupun bagaimanapun, kelulusan tersebut juga tertakluk kepada keutamaan dan kedudukan kewangan kerajaan. Manakala bagi SMJK Chan Wa II, pembinaan dewan serba guna yang dilaksanakan perlu mematuhi prosedur sedia ada KPM dan mendapat kelulusan ketua pendaftar institusi pendidikan dan guru terlebih dahulu selaras dengan seksyen 83, Perubahan Berkenaan Dengan Premis Institusi Pendidikan, Akta Pendidikan 1996 sebelum sebarang pembinaan boleh dijalankan.

Ini memandangkan sekolah tersebut berstatus sekolah bantuan kerajaan, maka KPM mengalu-alukan penglibatan pihak Persatuan Ibu Bapa dan Guru, LPS serta mana-mana agensi swasta untuk turut serta dalam usaha meningkatkan kemudahan sedia ada di sekolah.

Berhubung dengan pembinaan jalan masuk ke SK Jijan dan SJKC Kelpin, perkara ini adalah di luar bidang kuasa KPM. Sebarang permohonan pembinaan jalan perlu dibuat kepada Jabatan Kerja Raya (JKR) sekiranya terdapat keperluan memandangkan pembinaan jalan adalah di bawah bidang kuasa JKR.

Manakala bagi cadangan pembinaan padang di SK Jijan, JPN Negeri Sembilan merancang untuk mengemukakan permohonan tersebut dalam Rancangan Malaysia Ke-12. Manakala bagi cadangan menaik taraf kemudahan asas SK Tekir, setelah semakan dilakukan, tiada sebarang permohonan peruntukan menaik taraf kemudahan asas dikemukakan oleh sekolah tersebut pada tahun 2019. Sebarang permohonan peruntukan bagi menaik taraf kemudahan asas hendaklah dikemukakan oleh pihak sekolah kepada Pejabat Pendidikan Daerah (PPD) masing-masing yang akan dipanjangkan oleh JPN kepada KPM untuk pertimbangan dan kelulusan.

Tuan Yang di-Pertua, pada masa kini keutamaan pembangunan fizikal adalah untuk menaik taraf bangunan sekolah yang lebih daif dan kritikal. Sekiranya terdapat keperluan bagi pembangunan dan penyelenggaraan seperti yang telah disenaraikan oleh Ahli Yang Berhormat, permohonan boleh dikemukakan melalui JPN untuk dipanjangkan kepada KPM.

Justeru, bagi menjawab persoalan yang ditimbulkan oleh Yang Berhormat Rasah, KPM menyarankan agar setiap permohonan yang disenaraikan oleh Yang Berhormat Rasah seharusnya dikemukakan oleh pihak sekolah mengikut saluran yang telah ditetapkan iaitu melalui PPD dan JPN supaya perkara ini dalam makluman dan tindakan KPM selanjutnya serta mematuhi prosedur sedia ada. Sekian jawapan saya. Terima kasih.

Ketelusan LHDN dalam Mengutip Cukai di Bawah Program Khas Pengakuan Sukarela (PKPS)

2.45 ptg.

Datuk Seri Ir. Dr. Wee Ka Siong [Ayer Hitam]: Tuan Yang di-Pertua, ketika pembentangan Belanjawan 2019, Program Khas Pengakuan Sukarela (PKPS) diumumkan sebagai usaha kerajaan mengurangkan ketirisan hasil negara. Bermula 3 November 2018, seramai 225,000 pembayar cukai telah menyertai PKPS untuk fasa pertama. Namun, timbul beberapa persoalan.

Pertama, berapakah jumlah sebenar pembayar cukai termasuk individu dan korporat yang berdaftar dengan LHDN di bawah Program Khas Pengakuan Sukarela iaitu PKPS.

Kedua, nyatakan bilangan pembayar cukai yang telah menjelaskan pembayaran dan diterima oleh LHDN di bawah PKPS serta disahkan melalui surat penerimaan dan pengesahan daripada LHDN.

Ketiga, berapakah hasil pembayaran yang berjaya dikumpulkan LHDN menerusi PKPS.

Keempat, program yang dipromosikan oleh Menteri Kewangan dan LHDN sebelum ini memberi jaminan bahawa orang ramai yang menyertai PKPS tidak akan diaudit dan disiasat LHDN untuk penilaian bagi tahun yang diisytiharkan. Bolehkah Yang Berhormat Menteri mengesahkan jaminan ini supaya dapat meyakinkan rakyat bahawa selepas membuat bayaran dan surat penerimaan pengesahan LHDN dikeluarkan, mereka tidak akan diaudit dan disiasat.

Kelima, bolehkah Yang Berhormat Menteri mengesahkan bahawa LHDN telah melakukan audit terhadap pembayar cukai atau sedang menyiasat pembayar cukai yang telah melunaskan tuntutan terhadap mereka di bawah PKPS di mana bayaran mereka telah pun diterima oleh LHDN. Jika benar, kenapa LHDN melakukannya selepas menerima bayaran dan pembayar cukai dan berapa ramai pembayar cukai yang dikenakan tindakan sama diaudit dan disiasat.

Keenam, LHDN pernah berkata bahawa akan menerima pengakuan pembayaran cukai secara suci hati tanpa dikenakan sebarang tindakan susulan. Bolehkah Yang Berhormat Menteri mengesahkan perkara ini? Jika LHDN mengkaji semula kes-kes tersebut, bagaimanakah LHDN memutuskan pembayar cukai yang sedang dikaji atau tidak. Adakah ia dilakukan sewenang-wenangnya dan mengikut budi bicara? Jika ya, adakah setiap pembayar cukai di bawah PKPS bertanggungjawab untuk menyemak semula walaupun selepas surat pelepasan cukai dikeluarkan?

Ketujuh, LHDN secara terbuka mengatakan bahawa penalti yang dikenakan di bawah PKPS akan dimuktamadkan. Bolehkah Yang Berhormat Menteri mengesahkan bila ia akan berakhir dan tiada lagi penilaian akan dibuat,

Memandangkan pembayaran cukai secara sukarela didedahkan di bawah PKPS dan tidak lagi penilaian baharu dibuat, bolehkah Yang Berhormat Menteri memberi jaminan bahawa ia tidak akan dibangkitkan terhadap pembayar cukai yang telah menjelaskan pembayaran menerusi PKPS. Sekian, terima kasih.

2.48 ptg.

Timbalan Menteri Kewangan [Dato' Haji Amiruddin bin Hamzah]: Terima kasih Tuan Yang di-Pertua. Terima kasih Yang Berhormat Ayer Hitam. Bagi menjawab lapan persoalan yang dikemukakan oleh Yang Berhormat Ayer Hitam. Jadi jawapannya bagi yang pertama Tuan Yang di-Pertua, jumlah pembayar cukai yang telah membuat pengakuan di bawah PKPS adalah seramai 273,814 pembayar cukai yang meliputi pembayar cukai individu dan syarikat.

Saya mohon untuk menjawab soalan dua dan tiga secara bersekali. Sepanjang PKPS diadakan dari 3 November 2018 hingga 30 September 2019, LHDN telah berjaya membangkitkan

taksiran sebanyak RM7.16 bilion. Hasil cukai yang berjaya dikutip oleh LHDN melalui PKPS sehingga 31 Ogos 2019 adalah sebanyak RM4.03 bilion dan dimaklumkan bahawa jumlah ini adalah belum muktamad.

LHDN perlu membuat pelarasan dari masa ke masa kerana terdapat pembayar cukai yang menjelaskan cukai secara ansuran yang boleh melangkaui tempoh 12 bulan dan terdapat juga pembayaran cukai dibuat menggunakan baki kredit cukai yang belum dibayar balik oleh LHDN, kontra.

■1450

Menjawab soalan yang keempat, kerajaan memberi jaminan bahawa LHDN tidak akan mengambil tindakan audit dan siasatan ke atas pembayar cukai yang telah membuat pengakuan sukarela dalam tempoh PKPS. Komitmen ini dinyatakan dengan jelas di perenggan 5.10, Garis Panduan Operasi, Bilangan 1, Tahun 2019 LHDN. Bagi menjawab soalan yang kelima, LHDN tidak melakukan tindakan audit dan siasatan ke atas pengakuan sukarela yang telah dibuat di bawah PKPS selaras dengan jaminan kerajaan.

Menjawab soalan yang keenam, pembayar cukai bertanggungjawab membuat pengakuan sukarela bagi kesemua pendapatan yang boleh dikenakan cukai dan LHDN akan menerima pengakuan yang dibuat dengan suci hati serta tiada audit atau siasatan dijalankan kepada mereka seperti yang telah digariskan dalam Garis Panduan Operasi Bilangan 1, Tahun 2019 LHDN kecuali sekiranya terdapat kes yang dirujuk oleh mana-mana agensi penguatkuasaan lain berhubung penglibatan pembayar cukai dalam aktiviti jenayah dan penggubahan wang haram.

Bagi menjawab soalan yang ketujuh, tempoh pelaksanaan PKPS adalah dari 3 November 2018 sehingga 30 September 2019. Kadar pengenaan penalti dalam tempoh PKPS ini adalah seperti berikut. Jika membuat PKPS itu antara 3 November 2018 hingga 30 Jun 2019, kadar penalti ditawarkan adalah 10 peratus. Jika dibuat antara 1 Julai 2019 sehingga tamat PKPS iaitu 30 September 2019, kadar penaltinya adalah 15 peratus.

Selepas tempoh PKPS ini berakhir iaitu mulai 1 Oktober 2019, kadar penalti yang boleh dikenakan kepada pembayar cukai yang mempunyai isu pematuhan cukai adalah antara 45 peratus sehingga 300 peratus seperti yang diperuntukkan dalam akta di bawah pentadbiran LHDN.

Bagi menjawab soalan yang terakhir nombor lapan, melalui Garis Panduan Operasi Bilangan 1, Tahun 2019, kerajaan telah memberi jaminan untuk menerima maklumat pengakuan sukarela yang dibuat dalam tempoh PKPS dengan suci hati serta tiada tindakan audit dan siasatan akan dijalankan pada masa akan datang bagi tahun taksiran di mana pengakuan sukarela dibuat. Sekian, terima kasih.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Isnin 25 November 2019.

[Kamar Khas ditangguhkan pada pukul 2.53 petang]